

Reunion cu trahadonan riba independisacion di Siguridad Aereo a tuma luga



ORANJESTAD - Dialuna atardi Minister Otmar Oduber a reuni cu trahadonan riba separacion di Luchtverkeer Beveiliging (Siguridad Aereo) for di Departamento di Aviacion Civil. E reunion aki tabata hopi positivo caminda e mandatario a aclaria diferente duda y preocupacion cu tabata reina bou di e trahadonan. Ta asina cu for di basta aña caba e independisacion (loskoppeling) di controladonan aereo tabata den pipe line. ICAO a realiza diferente au-

dit na nos isla y cada biaha tabata bin dilanti cu no ta deseabel pa e organo di control ta den e mesun organisacion di esun di trabounan di toren, nan a expresa na varios ocasion cu nan kier mira un separacion di trabounan di ehecucion cu esun di supervision y maneho. Asina, despues di e proceso di reorganisacion cu a tuma luga den Departamento di Aviacion Civil a yega turno pa atende cu e independisacion di controladonan aereo. Na cuminsamento di maart,

Minister hunto cu Team di Maneho di Departamento di Aviacion Civil a palabra cu lo bin cu un stuurgroep cu lo guia henter e proceso aki y siman pasa e mandatario a firma e Decreto Ministerial pa instala e stuurgroep aki.

Den e cuadro aki Minister Oduber a haya cu ta na su luga pa sinta y reuni cu e trahadonan riba e proceso cu lo mester inicia proximamente. Durante e reunion aki e trahadonan a muestra nan preocupacion riba con lo ta

e miho forma pa structura participacion di trahadonan den e proceso. Aki e titular di Transporte na un forma transparente y habri a duna tur presente un splicacion di e pakico mester realiza e cambianan, a pone tambe riba mesa e diferente posibilidad cu tin pa loke ta trata participacion di trahadonan y a aclaria diferente duda cu tabata reina entre e trahadonan. Algo cu sigur a trankilisa e trahadonan ta cu tur hende cu kier bay den e structura nobo lo por haci esaki y cu

no lo tin un procedura di seleccion. Ademas, Minister Otmar Oduber a sigura nan tur cu ningun hende lo bay atras den salario.

A keda palabra cu diabierna awor e trahadonan lo duna nan reaccion riba e forma cu nan a eligi pa nan participacion den e stuurgroep pa asina diamars otro siman e stuurgroep por cuminsa cu su trabounan. □